

皇
清
奏
議

皇清奏議卷八

更定八旗兵制疏 順治十一年

林起龍

吏科給事中臣林起龍謹 奏為 勅查會典舊例更

定八旗兵制以重萬世富強之本事論語曰足食足兵夫
食足則富兵足則強足食之策臣於京倉積貯一疏略陳
之矣 臣請復以足兵之說進伏乞 皇上採擇焉我

太祖 太宗練成一旅雄師遺我 皇上掃蕩寇

氛削除叛逆勢如摧枯拉朽三年間統一海內歷觀史冊
伊古以來得天下之速之易未有如我 皇上者豈非

兵勁無敵於天下哉但 臣聞兵在 盛京無餉而富今至
京師有餉而窮細究其故蓋以 盛京地方素稱沃野一
切柴草魚肉菜蔬價值不昂莊頭部落曾無逃扞是以人
不以兵為苦今天下一家止有征調更番迭出往返動輒

萬里馬匹十損八九且南方卑濕軍裝器械無不溽爛滿洲不作生理專靠地土而地薄路遠疊遭水旱兼之新投莊頭不能養主反來索糧少加督責攜家而逃日用非錢不行物價騰貴數倍所得月餉有限而軍器什物棚仗馬匹無一不係自備兵安得不窮乎臣思明兵止出一身而馬匹器械俱取之於官今滿兵一人出征部落有帶六七人者有帶三四人者馬匹多者四五匹少者二三匹而馬匹器械事事備之於己明時分拔天下之兵以防邊我朝獨靠八旗之兵鎮天下揆之時地勞逸迥異甘苦懸殊似宜變通臣查會典開載馬政有京營馬匹各邊馬匹家丁馬匹巡捕馬匹值差馬匹軍餘馬匹諸款開載軍裝有號衣胖襖袴鞋布花雨帽壇衫諸款開載軍器有盔甲弓箭弦條刀鎗弩銃旗牌鞋帶撒袋鞍轡鞭子諸款開載

草料有明智等坊伍場草束太倉黑豆諸款以上舊例無一不用給兵今十年來外而九邊未聞奏討馬價關支軍器軍裝而三大營四衛營插刀紅盔圍子手大漢將軍裏九門外七門皇城四門紅鋪諸色軍丁軍器馬匹草料俱已裁革各項錢糧豁免在民乎徵解在部乎不以給兵支用何處乎今凡事俱查會典獨八旗舊兵為朝廷

禁旅壯鎮九邊南撫萬方者也定守舊制不查會典何與伏乞皇上俯念創天下者此兵守天下者亦此兵已居漢國難拘滿例隨地制宜因時立法仍以天下原設給兵錢糧查照會典通給八旗兵丁則人強馬壯兵精器足益增九重之威靈更壯六師之聲勢悚動萬國之聽聞消弭四海之窺伺久出遠征可無賠累之苦列戍分屯永絕措辦之艱一舉而衆善得矣然明例有不可盡拘者

官買馬匹侵尅多端瘦損不堪騎操徒費戶部一項草料
錢糧造解器械冒破不一粗惡不堪使用徒費工部一項
匠役錢糧且徵本色累民最深合無將馬匹草料軍器軍
裝各項錢糧照數折徵估定價值或一年給兵一次或三
年給兵一次或遇出征之時給兵一次使自喂馬匹自製
器械既無冒破之弊兼省工匠之貲此又事之極便者臣
儒生也本不知兵但聞語曰兵勞則罷人怨則變揣時度
勢私憂過慮冒陳若此如果可採伏乞 皇上勅下該
部通查會典確議詳覆更定八旗兵制以重戡亂定禍之
本萬世富强之業永遠無虞矣

分鎮海口疏

林德馨

都察院左副都御史臣林德馨謹 奏為分鎮臣以控海
口移快船以練水師濬濟西北咽喉鞏固東南半壁事竊

照 國家財賦多取給於江廣吳越而朝野血脈尤關通
於京鎮瓜儀近乃以海止遊魂敢於蹂躪內地既爾出沒
無忌未免驚阻商黎總以海口要害之地無控扼之勝策
一任海孽出沒而莫之制也為今計者急議移鎮固矣而
設防尤所必須業經科臣連章陳奏見在部議然備艦建
牙臣計得一愚敬為我 皇上陳之查明季舊例江寧
稱為留都設文武操江文則選之九卿督撫武則取之公
侯世勲置有兵馬船隻以討軍實而防巨測誠重之也我
朝定鼎為省官方之費議撤安撫乃移操江於上游
樂見太平遠弛海防於不講致滋蠢逆突興恣肆狂逞雖
經小創未即安瀾則修艦飭師綢繆寧容刻緩乎然防勦
之機權必得壯猷之宿帥舉之旗下恐於水戰未嫻再議
攝兼又恐鞭長不及伏見江寧設有提督武臣二員統轄

滿漢官兵如阿克善管效忠者皆平日飲馬江干橫槊水
渚大將之選無出其右者且標下兵丁多知水性與其駐
劄省城秣厲有待何如分飭海口以禦不虞況兵係見兵
無煩招募地皆汎地不謂越庖再 勅操撫駐節鎮江

商確機宜協同調度至於舟楫之需且更查得江寧馬快
船向以備進貢時鮮及獻解織造等用今皆奉 旨蠲

節見在六十餘隻灣泊江濱且船皆完整無論桅篷器具
無不畢備即一切舟子工食並可不待周章又皆提督兵
丁所熟識者計莫便於此惟 綸綍之一頒將澄清之

立見於此 臣更有請焉狼圖二山之設原以堵禦江口而
今賊去不知賊來無備用茲紂綉徒損 國威宜即令分
鎮督臣選用親信標下及智勇能幹之官具題充補乘潮
出汎盡地分防懸之以賞罰之格其誰不鼓厲以圖功名

於是而尚有闖入之海寇臣不信矣

請嚴因循積習疏

林雲京

刑科給事中臣林雲京謹 奏為因循積習已甚上下朦朧已極務在責實舉行用嚴稽核事我 皇上勵精圖治嘉與臣民更始薄海內外無不共慶昇平矣然而奸宄未盡屏息太平尚未全覩者其故何哉 朝廷雖有善政臣下奉行不力因循之弊一朝難破也如各省協濟之秦餉積欠至七十餘萬 畿北數年之沉獄各府計三百業因循已久雖屢奉 嚴旨猶曰額數之繁多卷業之稠疊須定其限期矣至如 輦轂之下臺臣被殺已數閱月地方責守等官未見從重處分 帝畿行劫亦幾閱月甚至迫近 皇城後門被劫未見設法嚴捕養寇如此何異養癰 帝城如此又何怪在外者之上下相蒙

彼此交謔乎錢法之壞非一朝一夕之故矣 朝廷屢

禁私鑄不用廢錢雖職官亦屢奉申飭或一月之間暫止而旅行或一年之內數止而數行是禁革奉為故事何嘗銳意剔弊使徹底澄清哉按差停止在外百凡振頓全付撫臣兼理迄今停差將及一年百司之綱紀作何振肅吏治之清濁作何激揚未見詳具入 告即有一二章奏

指陳賢否亦不過沿習本來舊規豈撫臣而兼代巡之任止可如是塞責乎且按臣撤回者既無舉薦撫臣以病乞休者又游移觀望迨甄別大定之後新膺 簡命者計

程赴任動輒數月兩年以來貪廉不分利弊無稽其中貽誤何可言哉因循之弊一至於此揆度所由上下朦朧

朝廷無所稽核故也臣以為以上各款責有專司自今伊始宜重為申嚴務破積習以臻實效其責在地方官者

在內 勅五城行糾在外 勅督撫行糾責在各督撫者 勅部臣行糾內以 旨下之日為始外以部文到日為始刻期具報以憑稽核其有附會不以 上聞並 上聞不實者治以欺罔之罪務在必行庶膏肓之疾一朝可破太平未有不立覩也

請嚴賑濟稽延疏

翁自涵

工科給事中臣翁自涵謹 奏為賑濟實沐 皇仁稽延反滋民累懇祈 天語嚴催速竣以安畿輔事項者

天災流行民生疾苦 皇上惻隱為懷恩先畿輔

特遣滿漢大臣十六員齎帑金二十四萬兩分道賑濟已經逾月 兇弊憂民如此海宇聞風感泣何獨八府窮民世世焚頂乃臣更有請者八府道里有遠近不同州縣有大小互異戶部雖經題明第斟酌銀數多寡尚未及勒

期報竣也臣謂民不失時則生計自遂官不擾民則民生自安方今南畝告急之時前此饑寒子遺皆勉強借貸牛種盡力耕作一聞朝廷有賑濟大典勢必懸鋤以待究竟賑銀少而窮民多速給猶可資生遲發便須守候窮民既苦盤費又妨農功得少損多反成累擾且大臣所至供億最繁夫馬糧料勢在不免問之官則有司何術點金派之民則災黎益深吸髓苦復日延一日恐有窮民未霑實惠而守令既苦於應接里甲更苦於推敲者以聖主愛民之心奉行未善不幾反致厲民耶乞

皇上亟

勅該部查照道里遠近州縣大小嚴催速竣大縣不得過兩日小縣不得過一日滿漢大臣務須先時榜示輕騎親臨為戒皇上早沛一日之恩即百姓早甦一日之命為各地方多省一日之費即大臣多造一日之福庶幾輔

安而天下舉安也況大臣為朝廷股肱六曹職業豈容久曠賑濟早竣時亮天工又諸臣所當夙夜自矢者耳如果臣言不謬仰乞聖鑒採擇施行

課吏懲貪疏

朱紱

浙江道監察御史臣朱紱謹題為課吏宜嚴舉薦懲貪務期確覈併陳糾參詳訊之法兼杜卸脫贓私之端以清吏治事竊惟親民之官莫如守令綜覈守令之貪廉而視為勸懲者莫要於督撫之舉劾使舉一人而循良莫不知勉劾一人而墨吏莫不回心則吏治豈有不清者無柰積習相蒙激勸罔效其故蓋有由然舊例有司考滿給由與督撫舉薦考語率用四六駢詞稱贊無實賢否易淆前年曾經御史臣李敬題請申飭而直省相沿未能盡革似宜更勅督撫今後凡有舉薦必就各郡縣行過事件如

兵馬錢糧刑罰防禦開荒撫流清弊剔蠹從實開列數項
務俾一覽鑿鑿有據庶可上 告以行彰瘡且令司道

揭報不敢徇徇扶同屬吏聞風無由營私請託此課吏之
最大者也至於貪官污吏不時糾參輒奉 旨該督撫

究擬具奏夫以督撫糾參即行督撫提問宜乎賊款確證
覆訊無不了然應時速結無疑情亦無滯牘矣乃率有延
久不結即贓私百千或云被害原未招承或云銜蠹公行
攤派及至遇 赦不過免罪追贓所以糾劾雖多而貪

風全不知警且輒有跪門瀆擾妄干 聖聽者今令令

督撫糾參互相質訊如督臣所糾者撫臣先行提審撫臣
所糾者督臣先行提審賊證明確然後會稿具奏下至司
道府廳凡係開送揭報之官不得承問凡係向來承問之
官不與駁審必另批別道別廳從公究擬其直省地方務

酌量遠近依期速完不得遷延幾倖 恩赦且滋囑託

等筭如此庶不至於先重而後輕彼枉而此縱其與原參符也則情真罪當固非執成見而失於刻深其與原參異也則矜原末減亦非違初心而依徇情面矣若夫有名衙蠹多為本官代認贓數者意以為犯官罹罪難以瓦全而衙蠹則改名換劉希圖復進舞文弄法故態愈狡今

恩詔一款凡貪官衙蠹俱在不赦則凡熟審減等之例衙蠹不得概援即擬徒擬流俱著本身充當不許納贖則必不敢輕為犯官代認而貪吏脫卸衙蠹之計亦有所不行貪墨之風庶幾永息矣

酌議開銷三楚兵餉疏

祖澤遠

欽命總督湖廣等處地方軍務兼理糧餉太子少保兵部尚書兼都察院右副都御史臣祖澤遠謹題為大兵供

億浩繁殘黎膏血已盡伏乞

俯賜矜憐酌議開銷事

竊照黔逆不盡數勦大兵一應軍需責之小民措辦者蓋不一而足矣即臣蒞楚以來亦已三見雖百姓負痛輸將臣見其骨盡皮穿已大有不忍見聞者然向日大兵喂馬之期不過二十日或一月而止今寧南靖寇大將軍臣陳泰奉 旨駐荆休息未可以月日計也其供億之繁備

辦之苦需用之久催逼之難有數倍於前者諸如糧料草束小民猝辦為艱猶有正項開銷可以償其勞苦若大兵各馬共計二萬五百餘匹需用槽餵各以四千餘計鍋隻以三十餘計搭馬蓬木植以二萬餘計割青草以代乾草割草夫役運草水手合算以七千餘計再如炊爨柴薪日需二千六百餘至收糟煮料尤有不可以數計者且往日供應諸物不過民間借用一時今駐養日多必件件精堅

始可以久用所費不貲勢不得不派之各屬各屬又不得不累之小民而貪官污吏奸里猾役乘機濫浸以一破十愚弱小民莫敢控訴民之苦已非一日而害亦非一端良苦痛也夫楚非無事之地也兵火頻仍災荒疊見連年勤兵重煩供應今以久駐之兵事事皆取足於水火兵荒百死一生之殘才臣以為不獨骨盡皮穿更復神枯而髓竭矣臣所不忍想

皇上更有所不忍也雖然責之民既不忍見其搶地呼天之狀責之官又難得其鬼輸神運之能臣再四思維不得已檄令各屬一面動支正項措辦解用以期無誤雖此項從無開銷正項之例然臣仰體

皇上愛民德意亦無例可援想此番供億較與喂馬二十日及一月者不同他省亦不得援以為例也諸項數目冗雜不敢煩瀆

聖聽除備造清冊咨送戶部并固山額

真臣季思哈兵馬駐長自有經略輔臣洪承疇支應報

聞外臣謹據具題伏乞 皇上憐疊經供應之民不

堪再派寬臣冒昧請命之罪 勅部酌議開銷庶

軍需不致重累小民而錢糧亦有歸著矣

再請開銷疏

祖澤遠

欽差總督湖廣等處地方軍務兼理糧餉太子少保兵部

尚書兼都察院右副都御史臣祖澤遠謹 題為難敵已

竭之髓別無挪補之方情迫再呼懇祈 鑒允事竊照

楚地干戈未靖疊罹災荒額賦不敷搜括殆盡且元氣受

傷而休息無日較之他省真時勢不同而情形迥異望施

格外之 恩難拘一定之例者此也如今春寧南靖寇

大將軍臣陳泰統兵駐荆一應糧餉草料俱先期儲備而

鍋桶刀槽搭蓬欄馬及逐日柴薪割青夫船之類不敢少

後其催辦轉運之艱盡悉之前疏矣凡此皆臣與道府廳
州縣殫心籌畫而發之官者咸願設錢糧出之民者係應
完賦稅未便開銷臣豈不知但臣任中已三見大兵經臨
而數目繁多往來接踵未有甚於此者且師行無期又不
可以月日計矣即以割青而言以草抵草照例銷算無容
他議而不知僱覓船隻幫貼人夫且有船碎夫逃復加拘
補而酷日驚濤中夫役之僵道路而葬魚腹者又比比然
若斯困苦臣又不敢瑣褻 上聞也今部議以前項向

無開銷成例俱欲臣設法酌量隨時支給題覆奉 旨

移咨到臣矣因思部臣守國之經恐金錢充額外之費一
定章程不容少為同異獨不知果有別項可挪別法可設
臣必畢為搜括斷不敢冒瀆 宸聰矣必欲遵守部議

臣亦有何良策抵補如許錢糧自然責成州縣自然取足

小民恐體枯待斃之黎不堪復以軍需加派也是賊未勦而民先困矣況目前支持原屬勉強倘一聞不准開銷之信縱有好義急公不肯醫瘡剜肉此後之接濟源源寧不可虞耶倘或追呼迫索更有不忍言者播傳苛勒之名釀成渙散之勢臣實有所不敢也身荷封疆重寄情急心切緣此不避狂悖復向 聖明籲控伏乞 皇上俯念楚省不同他省才遺僅有皮毛沛破格之 深仁蘇欲絕之民力將錫桶刀槽柴薪等項不拘見在之例特允開銷庶凋殘免額外之徵而輸將可散困苦沐 隆恩之渥而愛戴益堅矣

重名器疏

張嘉

江南道監察御史臣張嘉謹 奏為名器不可濫假懇臣不宜復進請 旨罷斥處分以肅班聯以清重地事竊

是非者天下之公論舉錯者 朝廷之大權故進賢退

不肖則賢者得以彙征而不肖者亦甘罪屏跡未有身蒙

棄逐復鑽營求進濫膺爵祿而覲顏居是位者臣於弘文

院掌典籍事編修金元禎不能不駭異焉元禎昔與臣同

官始巡按河南繼巡按蘇松貪鄙僉邪穢聲大著百爾在

位無不舉為笑談即長安士民亦無不眾口交斥順治八

年甄別御史已奉 旨革職為元禎者即宜悔過潛踪

甘心恬退乃復百計圖謀必欲身躋禁顯遂改頭換面濫

叨典籍編修之職無論密勿重地不可容此宵小然以革

職之官死灰復燃揆之 國典斷無此例夫以督撫糾參

之官亦有得還原職者然必完璧無瑕故爾錄用若元禎

顯然褫革可以改官別授則凡以監司革職者可別為知

府同知革職者可別為推官知縣也事關一人之榮辱者

小而關朝廷之黜陟者太如果臣言不謬伏乞
聖明即將元禎革職處分則賞罰明而勸懲可風勵天下
矣

綢繆封疆疏

陳 棐

山西道監察御史臣陳棐謹 奏為封疆攸係請
撫臣小心綢繆以收桑榆事臣聞即報見江寧巡撫周國
佐有微臣勦賊拮据一疏其自敘辦賊捷功鑿鑿浮於紙
上夫撫臣前報大戰奪賊巢穴方奉 旨確察真偽則
其功之大小有無臣不能懸揣也但節鉞大臣當封疆重
任固宜智深勇沉無事若有事事後若事中盡忠補過義
不辭難乃盡瘁報 主之職分也張名振一海洋亡命
耳輒敢懸師深入登金山瞰龍潭不謂不遠自春正至夏
五不謂不久一旦飽欲颺去慮且包藏禍心撫臣於此追

思往事竭力防護則名振之寇何得再行猖獗乃觀撫臣疏中有云大海汪洋茫然無際忽彼忽此賊無定向以此責臣是吳地之被寇可歸咎於浙且可歸咎於閩等語臣竊嘆撫臣不惟欲謝已往之責並欲弛將來之擔矣尚何賴哉夫海之無涯戰鬪莫施者在外洋則然耳其近內者潮汐不常淺沙膠舟彼無所用其攻我亦無所用其守其從入之路必由海口而海口有數故分汛設防以專責成如寇從閩之海口入則責成閩之封疆重臣寇從浙之海口入則責成浙之封疆重臣今寇實從蘇松入口門戶失守流毒內地撫臣身膺蘇松長城之寄而不任其責咎將誰屬既往之事固已莫及而以後寇之入犯終莫有歸咎之地則任封疆者一誤何堪再誤乎今名振全軍如鳥獸散而眈眈之視不可窮邇道路熟則計謀生脅從多則耳

目眾萬一踵至則撫臣必曰大海茫茫已先事言之矣封疆復何時哉伏乞 皇上嚴飭該撫於未雨之時預為綢繆之計使咽喉重地不致擾亂而措天下於磐石之安東南幸甚海內幸甚

安插流移疏

李 昶

兵科右給事中臣李昶謹 奏為安插流移兼清逃竄以拯殘黎以廣 皇仁事竊思天災流行民不堪命棄家就食勢所必然 皇上蠲賑之仁窮簷徧沐而終不能止其流徙者饑民衆多非趁食他方無以轉死為生耳近以逃人法嚴地方官不敢容留使鳩形鵠面之人傍徨道途間欲住不得欲還不能有相率而就死地之苦直省督臣李蔭祖流民轉徙堪憐一疏形容殊為迫切已奉有兩善之計交部速議矣臣愚以為安插與窩逃法之寬嚴固有

可並行不悖者夫所謂逃人者不過三五成羣潛匿於親戚之家及僻遠之境耳若攜妻子荷鋤驅牛驢而行如平度川木城關一業者乃偶有之事即間有攜婦女逃者粧束可改其婦女之耳輪不可掩也似宜於流民之法稍為變通令地方官嚴查牌甲詳造冊籍土著者為一冊流寓者為一冊細察其姓名口數原籍某州縣某里社人責令投遞互結將冊報部倘中有夾帶事發之日罪坐互結者地方官與土著者免議其被災地方亦令開造逃亡姓名口數一併報部兩相磨對如籍貫姓名或有異同非逃即流自可按冊拘提查理是流民安插雖寬逃人稽察乃愈嚴也且此法果行兼可盤詰盜賊使不能詭名託足挨查滑戶令不得巧脫丁徭不尤兩利乎又臣辦事垣中接得沂鎮臧廷齡揭帖內稱捉獲響賊六名帶馬九匹並弓

箭器械等物詰問之皆係逃人則逃人原不專匿於土著之家奈何偏以累流徙之衆使無罪而就死地乎夫使

朝廷數萬赤子填於溝壑固謂可憫即挺杖走險捫腹之輩殲滅亦易獨是此潢池荏苒同歸於戮其初固兢兢無告之黔黎也殺之不足為威思之終屬可憫 皇上堯舜為心一夫不獲時予之辜今此數萬生靈駢首就死諒 聖心之所不忍也然則寓察逃於牌甲之中寬饑民以收留之路或亦並行不悖之一道乎

謹陳民情疏

李開生

禮科給事中臣李開生謹 奏為因變陳言謹列民情慘

苦之狀事臣聞 上天仁愛人君因事示儆 聖主

善承 天意化災為祥臣辦事垣中日閱章奏入夏以

來屢聞河決昨又讀陝撫馬之光特報地震一疏壞城堡

傾廬舍斃人民變暴烈矣夫地乃陰類其象為民地道主
靜動則多凶地之不靜得無民有不安乎民之不安豈非
官之失職乎今 皇綸懇切臣工誰不洗心而親民尤

在有司是宜急為提撕使共圖消弭謹臚其賊民召禍之
事其端有十曰格 詔旨 皇上軫念民瘼遇災必

蠲遇饑必賑乃奉 旨免折錢糧狼棍蠹役表裏為奸

道府得賄遲遲頒發州縣匿 詔仍然橫徵及血比已

足然後奉行究竟官吏不吐絲毫百姓不沾涓滴此罔

上而害民者一也曰輕民命 皇上清問下民熱審

方行繼以 恩恤乃橫暴有司假酷濟貪無所不至而

最慘者惟取病呈一節試思罪當情真只該依律明處何
至暗施毒計寃害無辜是必有大不便於官吏者故急斃
之以滅口也此恣意而害民者二也曰縱豺虎佐貳首領

不受呈詞律也。啖其饋遺，遂任其漁獵。首佐既苞苴以飽，已欲復重賄賂以飽堂官。民誠不堪命矣。此怙奸以害民者三也。曰庇狐鼠吏胥無善類固也，仗為爪牙，因任其緣索。書吏賣票謂之下種子，皂快詐索謂之尋利錢。試問一帖辦也，三四人共之一差役也，五六人副之，乃至道府油牌星飛外邑州縣，火票電掃窮鄉。此黨役而害民者四也。曰重耗尅天下財賦，半出江南，而江南火耗之重，銀一兩加耗自一錢二錢有至五錢者。蘇松地方白糧百石官耗至五十兩，賣男鬻女敲骨擊髓，慘酷獨甚。

朝廷蠲錢

糧何如州縣省羨餘乎？至燕齊苦潦，荆粵苦兵，勉供正賦，民力已艱。徭役解辦為勞，亦甚。乃入多秤耗，加一加兩出，有扣減除二除三，此出入交剝而為民害五也。曰陰市易介壽稱新古亦有之，乃重納紳士之饋陰以事，酬廣徇鄉。

故之託中分其利致土著挾寵而毒鄉曲遊客沒利而剝小民上下交征而為民害六也曰喜株連事非叛逆罪止其身今則一盜之獲必令誣扳富厚一賊之追必令漫及親知是盜止盜一家捕盜者反為盜於一邑賊止十百追賊者且濫賊百千捕胥因之而私拷旁煥可勝言哉其為民害者七也曰安急荒夫狀詞宜速提速結所以寢弊正所以惜民也乃或杯酒是事淫佚是耽案牘不親而急務深究悉歸沉擱防閑不固而主文家隸得以交通故雖

欽件之大動隔年月不聞結奏而下此可知矣 朝

廷設官分任亦何為哉其為民害八也曰失彈壓彈壓有司在於藩臬果其清慎勵己公勤率屬孰敢不從無柰徇於情面染於饋遺愛憎一移是非易向有奸不舉是縱屬以剝民者也其害九曰漫糾彈糾不職在於督撫誠能察

之進謁核其政績人豈難知無柰借司道品題遂為成案
委託非類賢否混淆舉劾不當民害亦何由除也其害十
凡此者其置民墊溺甚於決河傾民室廬殺民軀命甚於
地震不可不急為修省者也

京倉積貯疏

林起龍

吏科給事中臣林起龍謹 奏為速講京倉積貯之法以
圖久遠事臣惟王制曰國無九年之蓄曰不足無六年之
蓄曰急無三年之蓄曰國非其國從來裕國之道積貯為
先而積貯之法在先事經畫未雨綢繆補天道之缺修人
事之窮斯存恤有資拯救有備水旱不能為災若講之無
素儲之不早一遇天災流行地利無所出人力無所施賑
濟則國用不敷蠲免則軍餉又缺以致流離相屬盜賊蜂
起而意外之虞不一而足矣我 皇上德邁唐虞功高

湯武受

皇天之付托父母斯民幅幘若是其廣兆庶

若是其衆時和年豐在小民固盡心竭力以輸正供若遇有偏災救荒無策何地何人不望

朝廷之賑恤即京

師之地數百萬軍民臣庶何一不仰賴

朝廷之給予

以為存活而京倉所貯無論九年六年欲求三年之蓄而不得言念及此可為寒心伏乞

皇上勅下司國計諸

臣悉心籌畫何者為處常之道何者為禦變之方何者是目前苟且之圖何者是百世不拔之策從長計議加意撙節必三年餘一年之粟以實京倉或再於北省穀賤之地於正項錢糧中減十分之三四令民或麥或豆或小米高粱納充正餉除臨清德州二倉額設外本地修蓋倉囤隨時積貯行之久則內外所蓄自多蓄積多則無施不可如遇江南被災下荒則本色可折中荒則截留一年上荒則

全留賑濟即將山東河南所積雜糧運至京師幫助京倉
充給俸餉則每年不至專藉東南之運矣如遇江北被災
即動所積雜糧下荒則出糶以濟之中荒則貸種以助之
上荒則開倉廩以賑之南糧仍得直達京師則緩急有情
不至臨時周章矣如遇畿輔被災小荒內則俸糧預支
外則徵比暫停大荒則或設飯廠於近地或發銀米以賑
濟遠方待漕運抵通秋冬又自有備可無近渴遠汲之虞
矣總之京倉有三年之蓄則南北可以通融遠近可以接
濟內外可以挪移不然日度一日年用一年謀近不慮遠
慮常不思變豐年不貴穀粟委之如泥沙凶歲倉儲空虛
寶之如珠玉雖蠲免賑濟俱屬浩蕩 皇仁而查勘申
報動經歲月吏胥豪猾因緣作奸澤不下究惠亦何補況
民生國計胥當經畫在嗷嗷待哺之衆膜視固所不能而

天下之本精於乃國家大事先事預防實為善策置此
不議而欲補救於臨時蓋亦難矣

禁紛爭重廉恥疏

王永吉

都察院左都御史臣王永吉謹 奏為請嚴禁紛爭以定
國是重廉恥以正人心事臣聞予奪者 朝廷之大權
恬退者臣子之大節大權握於 上故賞一人而天下
知勸罰一人而天下知懲誰敢抗衡 至尊干犯法紀
大節勵天下故難進易退則為君子易進難退則為小人
誰敢背違公論變亂是非若大小臣工悍然不顧恩威在
廷清議又不足憑則紀綱廢墜焉競成風何以正百官而
正天下哉臣於途次接閱邸報見原任山東撫臣夏玉督
撫考核雖定微臣功過當明一疏內有因晉撫劉弘遇具

有考覈已定一疏故不得不泣願於

君父之前等語

夫夏玉之剖陳固因劉弘遇之奏辯而來然劉弘遇之奏辯實繼原任督臣佟養量之抗爭而起也一督倡首於前肆無忌憚故兩撫效尤於後刺刺不休此端一開將來兵部考核武職內察考核京官 朝覲考核外吏誰肯安

心降革勢必羣咏爭鳴挾仇反噬無所不至黑白莫辨邪正顛倒將來 朝廷黜陟幽明進退官吏之事付託何

人大法大綱關係最重臣所謂息紛爭以定 國是者此

也 皇上因吏治未飭民生不安皆督撫徇縱之過特

行考核澄汰不過數人重者止於降革若佟養量僅解其任耳 皇上優容大臣可謂至矣佟養量自宜實心供

職一塵不染正己率屬仰報 主恩乃以勦寇開荒督

撫本分之事何足言功令連篇累牘瑣故於封章之內以

自明其稱職至其所屬餉司陸元龍通同鎮將冒餉六萬
餘兩終養量既失檢敕於前及劾參後反移咨戶部欲留
餉司再管一年即此一節其徇私壞法豈解任足以蔽其
辜哉乃猶不安心待罪奮自怨艾竟敢飾非強辯使人盡
效尤莫所底止臣所謂勵廉恥以正人心者此也伏乞
皇上天語嚴飭自今以後共勵官常各修職業咸福出
自一人是非還之公論庶朝廷正而百官正百
官正而天下正矣

皇清奏議卷八

皇清奏議卷九

陳史法以襄大典疏 順治十二年 湯 斌

翰林國史院檢討臣湯斌謹 奏為遵 諭陳言謬

條史法仰祈 睿鑒以襄大典事臣學識淺陋濫竽史

館欣逢 皇上廣開言路 諭諸臣殫竭忠誠共圖

補救臣敢不謬陳一得以備採擇臣竊惟史者所以昭是

非助賞罰也賞罰之權行於一時是非之衡定於萬世我

皇上御極初年 命史臣纂修明史誠有見於國

可廢史不可滅大公至正比隆堯舜矣然臣聞當時纂修

止據實錄未暇廣採臣愚竊以為立法宜嚴取材貴備實

錄所紀恐有不詳如靖難兵起建文易號永樂命史臣重

修實錄則低昂高下之間恐未可據他如土木之變大禮

之議事多忌諱當時史臣不敢直書一也二百餘年英賢

輩出有身未登朝而懿行堪著或名止閭巷而至性可風
前代史書如隱逸獨行孝友列女諸傳凡皆實錄所未備
二也天文地理律歷河渠禮樂兵刑藝文財賦不得其人
不歷其事不能悉其本末原委三也臣謂今日時代不遠
故老猶存遺書未燼當及此時廣搜野乘如吾學編憲章
錄大政紀通紀史料從信錄世法錄以及天下郡縣志並
許參考則道法明而事辭備經緯錯綜瞭若指掌矣臣伏
讀順治九年十一月十七日 上傳云明末寇陷都城
君死社稷當時文武諸臣中豈無一二殉君死難者幽忠
難泯大節可風大哉 王言開一代忠孝之原肅萬載
臣子之極一時范景文倪元璐劉理順等皆蒙旌錄自當
照耀史冊但明末寇氛既張蹂躪數省或御命出疆或授
職守土以至布衣巾櫛其間豈無抗節不屈審義自裁者

而社稷成墟身名俱隕凡此皆宜責令各地方督撫確查
詳奏與范倪諸臣並列史書者也更有請者宋臣歐陽
修纂五代史不為韓通立傳後世譏之宋史修於至正三
年而特傳文天祥之忠元史修於洪武二年而並列普顏
不化等之議古今題之我皇上應天順人救民水火

雲霓之望四方懷蘇然元二年間亦有未達天心徒

抱片節硜硜之志百折靡悔雖逆我顏行有乖倒戈之義
而臨危致命實表歲寒之心此與海內渾一竊名叛逆者
情事不同伏望皇上以萬世之心為心渙發綸

音概從寬宥俾史臣纂修俱免瞻顧則如天之度姚

美前王獎勵臣子昭示後世其於綱常似非小補矣

興教化以正風俗疏順治十二年魏裔介

兵科給事中臣魏裔介謹奏為興教化以正風俗事臣

聞刑禁於已然之後禮禁於未然之先今自明季以來風俗奢靡僭越無度浮屠盛行禮樂崩壞臣數年來在都門見隸卒倡優之徒服色艷麗負販市僧之伍輿馬赫奕庶人之妻珠玉炫耀雖經禁約全不遵行喪事之家盡耗資財以供焚燬生不為善死希冥福齊僧念懺婆婆跣神不厭敷四瓶寺建塔聚眾號呼皆以無益之事害有用之財而各直省府州縣簿書敲朴視鄉約六諭之教為虛文千百中無一人舉行者欲民之不困於財而興於禮讓也得乎今宜將侈靡蠹耗之事一切再行嚴禁凡違者必治其罪僧之無度牒而私剃者勒令歸農以後私度者必治其罪昔洪武明君也當榜示天下寺觀僧道俱不許奔走於外交構有司所至僧寺必揭周至冊驗實不許民間兒童私自削髮為僧違者坐罪凡以一道同風使民務於孝弟

力田而一國家收富強之用至於鄉約六諭教民旌善懲惡之事春秋修舉勿視為故事則民皆有淳樸向化之思矣

直陳海寇釀禍之根疏 順治十二年 龔鼎孳

都察院左都御史臣龔鼎孳謹 奏為直發海寇釀禍之根密請 乾斷事海賊鄭成功負 皇上招徠之

大恩旋撫叛今且攻破漳泉等郡聲勢猖獗奮螳臂以抗 王師幸 天討大張旦夕自當授首但釀禍之人不問則行間之賞罰不靈釀禍之根不除則內外之消息不斷臣不避嫌怨敢為 皇上密陳之浙閩總督

劉清泰勦撫無能一籌莫展當固山金勵攻圍海澄時勢必在克清泰乃不能相度機宜同心撲滅致賊眾復肆狂逞禍成燎原其貽誤者一也及見事不可為遂以病請歸

蒙 恩俞允而新督未至自宜仍駐衢州控制險要乃束裝返轡早踰杭州以西近閱其本章軍政料理文移與平時無異則非不起之病可知借口息肩獨以憂遺

君父其貽誤者二也此臣所謂釀禍之人

皇上宜亟

賜處分以飭勵行間者也同安侯鄭芝龍蒙

朝廷泰

養之異數自古未有初猶謂借其榜樣勸導來歸今十年於茲桀驁彌甚芝龍僕從諸人往來不絕家信頻通既不能訓子革心又不肯束身待罪出入

殿陛密通

宸嚴子弄兵於海壖父高枕於都下行路之人知其不可

皇上縱念投誠之勞不忍即置於法然其一切起居

動靜何可不倍加防閑倘用兵之際虛實或為所窺封疆之憂近在肘腋此臣所謂釀禍之根

皇上宜早為留

意以肅清內外者也

敬抒管見五條順治十二年

葉舟

兵部職方清吏司員外郎臣葉舟謹奏為遵諭陳

言事臣伏讀上傳令在京七品以上文武滿漢官員

凡掌職之內詳切敷陳以資採用務要各抒所見毋得泛
浮空言雷同塞責欽此臣敢不就職掌所聞敬抒管見為
我皇上陳之

一曰清冒占之兵冗兵不裁則糜餉冒占不去則耗兵今
鎮將以下各營之兵多者千餘少者亦不下數百豈人人
盡皆勁卒足供騰驤之用乎臣查十年六月內臣部前任
尚書王永吉奏為欽奉上傳等事一疏內議兵制當

核請飭各督撫將境內官兵通盤打算某鎮衝險防
兵當厚某營平緩戍卒宜裁各督撫亦漸次舉行增減得
宜獨是逃亡缺額老弱冒占之兵畢竟積弊相仍開報無

幾即歲有季報不過虛應故事未嘗實力奉行是止核其額外可省之兵而未核其額內不實之兵兵益少而力益單不幾以裁兵而反受兵少之害乎臣以為宜嚴飭各督撫實心查核近者親自校閱遠者轉檄才能兵巡道查閱務期營無弱兵兵無虛餉有不實者該督撫飛章參處庶稽查嚴而冒濫杜永收馳勇之用矣

一曰公舉劾之典賞善罰惡二者不可偏廢若賞重罰輕武夫悍卒益驕橫而不可制臣近見軍政一典本朝十年以來方始舉行及查督撫開報各冊八法處分大小武職幾三百四十餘員內止總兵二員副將二員參將遊擊亦不過三十員其他皆都守千總而已即此三十餘員鎮將又大半係解任裁缺緣事陞任之人其現任謫處者寥寥數員點綴了事不盡皆大貪大惡也豈其餘鎮將參

遊等官類皆兢兢守法賢良素著者乎此無他見任則彌縫之術工官大則應援之途廣也臣以為宜通初各督撫以後每歲嚴加甄別舉則盡刻毋濫劾則盡嚴毋寬其有惡蹟顯著者不時據實糾參更當法行自責無僅以官卑職小塞責倘或容情徇庇養虎貽害聽科道官查訪糾舉該督撫即以溺職論庶舉劾嚴而武臣知所畏憚矣一曰防驕橫之漸武職之與文職事有相關名位實不相輻故凡鎮將勅書必云一應錢糧詞訟有司職掌毋得干預臣聞卽報見督臣金瑬參固原總兵李茂一疏內稱每年派各斗行半價糴豆私派堡寨交納馬草又見科臣張文光參壽春營參將徐長春一疏內稱侵占民房強霸行市吊打生員王鞏運甚以穢物填入其口夫固原總兵駐劄之地有道府縣官壽春營駐劄之地有壽州州官

生員百姓與鎮將何與而聽其凌辱肆其科派道府州縣不敢過而一問其強橫尚可言哉臣以為宜嚴飭鎮將等官不許欺弱士民凌制有司并申明文武不相統轄之義有肆害科派者有司申報督撫題參重治庶體統明則不受制騎橫之氣可漸消矣

一曰塞規避之路文職京官告病查驗明白准其回籍病痊起用外官則徑准休致無病痊起用之例所以杜規避也今武職忽而稱病督撫代題解任忽而病痊督撫又具疏請補移咨求用矣豈非值多事之時則託病以謝責遇事平之後復倖倖以圖榮乎又督撫提鎮一遇陞轉多題請營將帶赴新任不曰效用需人則曰臂指得力設使新任果屬巖疆猶不妨借才以供驅使倘或趨逸避勞去甚就甘不適以滋倖實乎受爵

公朝拜恩私室至非今

也二者皆規避之路不可以不塞

一曰嚴効用之選臣衙門舊有奉

旨設上本辦事堂

候聽差等官上本辦事人等為數無幾或由科目或係効勞俱在衙門供事惟差官一途額糧百名以供奉差押解投文護送之用舊日多有無賴積棍冒充其中一經奉差衙門撞府如虎如狼多騎越站騷擾驛遞無所不至前此壞事被革或飽颺而去者往往有之案查十一年三月奉旨斟酌考用授以守備職銜臣思武進士方選守備武舉止選千總外委各官銜鋒破敵非有紀錄不准題補今以白丁効用數年而即得四品職官終覺未當且此輩奔走之日多習學弓馬韜略之日少一旦授以汛防要地人缺未必相宜臣以為遇有差官缺出宜選用一科二科武舉彼出身科目必知自愛身名以之奉差自能守法再

定以効勞年限滿日分別等第考補各項守備其以前効用差官或念其奔走日久不便遽為裁革必嚴加查覈果素無過犯又復諳練弓馬韜略者方准照例考用庶官與人相稱而効用一途不致滋匪人之弊矣至於各督撫題補之例亦所以鼓勵武臣一端又不可不察焉嚴疆督撫所恃以鼓舞麾下憤勇成功者以有爵賞動之也臣查十年內經略輔臣奉有吏兵二部不得掣肘之旨請自

今用兵地方督撫遇有題補查果人地相當有功可錄不妨酌量准從其他年定之處不為例庶幾軍心踴躍可以收得人之效矣以上各款皆臣職掌所關故敢詳切敷陳惟
皇上採擇焉

整頓邊圉疏

順治十二年

陳應泰

欽差提督雁門等關兼巡撫山西太原等處地方都察院

右都御史臣陳應泰謹 奏為遵 諭敬陳整頓邊圉

之謨并拯救兵民之要仰祈 睿鑒採擇事欽惟我

皇上軫念疆宇水旱頻仍干戈未靖惻然有一夫不獲
時予之辜之心因而 下詔求言博詢化理冀羣策之
中或有一當以仰佐 廟謨甚盛意也臣以駑鈍叨任
封疆敢不以身親實歷聞見最真之事上副 清問而
如以浮蔓雷同之言苟且塞責則臣誼所萬不敢出者謹
就地方目前情形將邊圉之預當整頓兵民之亟宜拯救
者臚為四事為我 皇上陳之

一議修邊備以固封疆夫居安慮危自古識之而思患預
防往訓所戒臣惟山右為 神京右臂三關鼎峙營衛星
羅西界河而北界蒙古蓋樺林樓子等堡一河之外與套
為鄰故前朝於偏關水泉屹然稱重鎮焉自我 朝定鼎

中外一家邊烽無警而腹裏州縣率多伏莽竊發之寇則當事者往往重內而輕外然天下之事每生於人之所忽目前之見為不必經意者政長慮却顧之士所當孜孜日夜而圖者也蓋邊垣起自東路北樓接紫荆而西訖於偏頭河保延袤八百餘里其間崇墉疊嶂限以內外金城千里之勢查明季歲有修邊之舉所需工匠皆取給於本省州縣衛所民壯班軍每年不下萬餘兩班輪流一半赴邊修工一半留各州縣衛所為城守防禦之用自我朝削平海宇其民壯班軍悉議裁省工食月糧改解充餉是以十數年來邊垣並未大修加以連歲巨雨如注水浸坍塌以致崇墉漸圯雖邊方之官稍有捐葺而力小工繁終無補於頽廢況營路之兵比之原額裁而又裁減而又減當此承平之日臣竊總總然不能無隱憂焉臣思民壯班軍

既已省裁驟難議復工食月糧既已充餉不便議留合無
仰請 勅下沿邊道將於邊垣緊要之處查有圯壞者

每年督率所部兵丁酌量帶修兵丁於月糧之外量加工
犒以示鼓舞其工犒之資即自出地方官倡捐并紳矜好
義樂輸統俟年終容臣查勘如果道將能修整邊垣并紳
士尚義急公者即據實題敘紀錄獎勵如若怠玩不修及
騷擾生事者臣亦據實指名參處如此則邊垣已頽者有
修整之期而未頽者無復圯之患至於兵丁責成道將就
見在之額汰其老弱募補精壯時加訓練馬匹已經臣

題請奉有

俞旨動支錢糧見在買補以實營伍外所

有沿邊一帶盔甲砲火器械亦應責成該道將不時查驗
如有朽鈍銹溢不堪者即行呈報詳請修整以期實用與
夫邊口之盤詰內外之隄防尤當時時加防於以鞏嚴疆

而安重地誠今日不可不亟加之意也

一酌恤征兵以鼓敵愾夫師行糧從勢所必需而行糧支給原分主客客兵准給行糧主兵不准支給蓋以本地之兵防勦本地之寇而言也若夫出征於數千百里之外勢不能裹糧以相從而兵又不可枵腹以之米者勢也支食之米而扣其應得之餉以致各兵家口嗷嗷者似非體恤之情也合無仰請 勅部酌議除本府之兵勦本府之寇仍作主兵不支行糧外倘勦別府之寇悉以客兵論或照客兵例一體支給行糧或照出征兵丁除月餉外量給安家之口糧惟二者之間酌行其一則各兵出有宿飽之資入無內顧之慮洵軍中鼓舞之徵權所關匪渺小也

一清核荒亡以裕國賦 臣惟錢糧為軍國大計目今司農仰屋邊餉呼庚則凡可以裕國而足用者不可不於田賦

戶口亟為講求也臣以為其道有二一在於清查奸詭之輩以熟地而捏報荒田以見丁而捏作逃戶勢惡影射遁賦為奸一在於清查賠累之民地真荒也而今熟地包糧丁真亡也而今見丁包額窮簷拖累日就凋疲蓋三晉之民連遭冰雹疊受寇殘逃亡最多而廬舍邱墟土田荒廢匪伊朝夕矣使從前地方官果能加意清理與民休息元氣當可漸復而孰知竊有不然者臣自蒞任以來據州縣申詳士民控告或地荒丁亡或河漂水塌或王田屯荒或加增戰故每於出兵之處暫給支客兵倉米而至回兵之日算其支過之米扣其應得月餉以抵還此皆因不設行糧之故也惟是各營戰兵月餉不過一兩五錢即給本兵一人當此米珠薪桂猶不足以自供況有父母妻子俯仰待饗者乎是各兵在平時之贍養固難矣及至出征不設

行糧借支食米事完除餉則各兵冒鋒鏑於戰陣之間効
奔命於霜露之地苦辛萬狀歸師之日見父母妻子不能
復半菽之飽其何以鼓戰士之氣也哉如臣前遣省城官
兵往平陽協勦積年巨寇張五等賊往返二千餘里歷經
數月並無行糧臣目擊兵之疾苦情狀并據各兵之紛紛
泣訴何敢默默臣愚以為本府之兵勦本府之寇可以主
兵論也若本府之兵勦他府之寇往往千里動經累月則
當以客兵論也何也晉中幅輳遼闊各屬之地遠者距省
千里近亦不下數百里兼之山勢崎嶇跋涉往返之數何
啻倍之夫勦寇於千里之外而猶為主兵則各兵實有難
為情者矣況山藪餘孽飄忽靡恆聞警疾馳朽腹不可以
戰其不得不借支隨地客兵無主者臣恐其間奸豪蠹里
欺隱朦報隨嚴批藩司確勘查核正在駁行未據詳覆而

今又奉有戶部題請

俞旨清理地土人丁各省責成

右布政使遵行在案則是清欺隱之地丁以裕國儲去真正之荒亡以甦民命全於右轄一官是賴臣請嚴其考成以別功罪明其賞罰以示勸懲如本官不瞻徇情面不私受苞苴果能清出欺隱地丁若干除去真正荒亡若干以仰副荒田逃戶灑派包賠一切嚴行禁革之 諭旨則

本官應優叙紀銓倘若瞻徇朦混者經臣查出參奏重加處分如此則尺地之民悉供正賦僻壤遐陬悉去重累而井閭受更生之福 國計民生大有攸賴矣且不特此也年來考成之立法甚嚴而州縣之積欠如故試一稽查往牘完糧州縣分數畢竟早完欠糧州縣分數到底拖欠非欠糧州縣之官盡皆怠玩不肯催徵盡不愛功名甘於參罰也蓋緣地土有實荒蕪人丁有實逃斃徒存紙上之原

額難為無米之炊亦付之無可柰何惟將真正之荒亡一除則熟地見丁徼輸易於足額有司畏參罰之嚴未有不竭蹶急公而軍需京運源源相繼寧有拖欠後時者也

一選練鄉兵以弭寇盜清查奸宄為首務況山右崇巒疊嶂綿亘深邃田少山多易為盜藪而且西距秦省南連豫壤東接畿郡則別省接壤之賊每多流來山谷飄忽出沒竊發堪虞然賊不敢窺犯於有兵之地而率突逞於無兵之所迨至聞警調發兵至則竄匿無踪兵回又剽掠如故臣受命以來深為此慮遂請發滿漢官兵前往平陽入山搜勦以期大創為一勞而永寧幸今渠魁張五已經授首而賊黨勦撫甚多第竄奔之餘不無遺孽而山川綿亘鄰省外寇又不能保其不來則凡州縣弭盜安民以為善後計者洵不可不深長慮也臣愚以為專責成州縣印

捕官倣古寓兵於農之意隨其村墮大小鼓勵鄉勇編成保甲擇其中有素行端莊才力服衆者為之鄉長以統之無事之時聽鄉長約束清查奸宄一遇賊寇猝至村墮鄉長則統率鄉勇各力捍禦一家有事求家救之一甲有事衆甲救之一村有事附近衆村救之如能保全村墮捍禦盜賊印官將為首勦助之酌量獎賞以示鼓勵如或疎虞觀望致有失事印官亦量行連坐之法分別責儆以戒將來若其遇小寇也鄉兵之力能制之鄉長惟統率鄉勇擒獲即時送縣審理倘其遇大寇也非鄉兵之力能制之鄉長則統率鄉勇一面合力捍禦一面飛馳報官發兵勦捕如是無事之時既可以清盜寓詰奸宄有警之際又可以禦盜寇保村莊雖有竊逞之徒亦無所施豕突之狡矣古云衆志成城家自為守則行保甲以寓鄉兵誠弭盜安

民之良法也以上四條俱於地方兵民之事不敢不據
實直陳伏乞 聖鑒

敬陳兵民之困疏 順治十二年

杜 洩

禮科給事中臣杜洩謹 奏為敬陳兵民之困宜施補救
之方仰希 睿照以備採擇事竊以民為邦本本固則
邦寧至養兵設防又以保邦而衛民也臣於兵民疾苦雖
不能縷陳謹以耳目之所及並商旅之所傳說痛心疾首
可堪出涕者為我 皇上陳之

一曰撥補之地租不可不清也臣聞 畿內被圍地土率
皆於各處州縣衛所撥補抵還素懷土常物之大情多無
往彼耕種者不過租給本人以應賦稅以竊餘潤耳向因
各官自護其民視北民若秦越而胥里遂叢弊於其間有
有冊而無地者有有地而無名者租錢多寡咸顛倒於里

胥之手以硲地而索上租以沃壤而出下租至相訟於官
北民之强者肆行詐害有索至數倍數家者本地之强者
故為久持有致其質衣行乞投河挂樹者甚至彼此謀害
牽連人民打殘肢體凌辱婦女者臣祈 皇上勅部嚴
查限三日內速造清冊三本以部印鈐蓋部存一本兩地
各發一本如冊有不清被人告發官參更究以示懲創其
地畝仍造上中下三等部定租值以免分爭庶兩地之民
相安矣

一曰防兵之利弊不可不詳也臣聞兵有月糧衣食所資
不肖將額每設法扣除使健兒短氣又恐諸軍怨望則濫
設駐防以賞所失兵丁明窺其意擾害自不必言是以道
遙河上醉飽是圖甚至有拆房供爨割田代芻捉市人為
僕役淫良家為嬉笑者是兵受將之害而民又受兵之害

聞見者莫不惕心也如山東高苑因謝阡之亂設有防兵
及其遊魂久冷二年之後始得撤還如直隸雄縣因南北
之衝設有防兵今皆得食各村桑麥俱倒雞犬一空臣祈
皇上勅直省撫鎮查有敢虧短軍糧者許將士互相
告訐以軍法議其後仍令有事而設防者勿近民居勿據
民食其無事而設防者兵歸其伍吏治其民庶兵民可以
休息矣

一曰商竈之苦累不可不恤也臣聞行鹽之商有益國課
故向來鹽運各官每待之以禮以示優勸近來貪風日熾
視鹽災為利藪視商人為魚肉即有富商或立借貸名色
暫充通欠其實並不償還其商之貧者則凌辱百端因拘
痛打是以竄逃民間不事舊業此鹽課之所由虧也至竈
戶居斥鹵之地編民之最苦者也酸風烈日拮据灘場又

謀生之最苦者也近日大灘皆歸富商所剩者灘之最瘠者向聞有官吏食鹽一鹽即傾數家夫官有俸錢吏有工食此等名色創自何代且本地州縣又濫加私稅稅自有常豈容私索即此二弊竈戶幾不聊生矣臣祈皇上勅部嚴行申飭如有仍前索詐諸商肆行凌虐者當指名參處至竈戶食鹽私稅嚴革永禁犯者以枉法論庶商竈可得存立矣

一曰錢法之通塞不可不議也錢者泉也出之不窮用之無方以利用也今錢法不通為害匪細即先以兵糧論臣聞浙江支發兵糧十兩之內銀得其七錢得其三官發則以一千為一兩民間則以一千數百為一兩軍恃其錢貴欲強買而不能民視其錢少欲賤鬻而不肯每一交易輒成聚訟此其弊蓋因官吏風示之不善與夫收納之不一

故也官之所收者銀也而迫民之所用者錢也其所令反其所好氓雖蚩蚩豈不喻其意乎且用銀既多錢自減價如是而欲錢法通行錢數相準無怪乎痛策而不前疾呼而莫應也臣祈 皇上勅行該直督各項錢糧必收十分之三以為官俸軍糧公費工食之用一兩止收一千不許毫有加減至各關稅銀亦收十分之五使北上糧船帶交戶部既以助京師鼓鑄之不足復以驗各省鼓鑄之美惡官民兵商悉如一體庶錢可流通矣

大道永計疏 順治十三年

陳之遘

太子太保戶部尚書臣陳之遘謹 奏為敬陳大道永計仰請 上裁以恤滿洲兵民事竊惟滿洲兵民實為

國家根本年來窮苦日甚關係非小但富強霸術利害相參賑濟 恩施久遠難恃臣謹以大道永計為 皇

上陳之

一曰修舉農功昔周代良法寓兵於農

本朝計丁受

田兵馬器械皆從此出其制實與周合乃連年饑饉徧野
荒蕪雖屬天災流行亦由人功怠惰應請

皇上急擇

每旗才幹大臣一員并諳練農事通曉水利官二三員將
本旗地土逐處躬親巡閱招集土民講求清川何處當修
積水何法放出中間地防決口一一審詳預備淫霖兼防
亢旱算工估費

勅下所司速措錢糧佃戶量幫人力

及時修築限日告成惟斤費必多實係一勞永逸豐年必
然厚獲凶歲亦不大荒此乃務本之道也

一曰寬恤兵力天下經制漢兵歲費錢糧不下一千餘萬
乃守多不固戰多不克一有警急輒勞滿旅遠涉或數千
里長征一二年出兵之時買馬置器措費甚難凱還之日

馬倒器壞又須買補滿兵月糧幾何堪此重費應請

皇上嚴飭各督撫提鎮將所統轄將士悉照滿洲兵法訓練精強如有棄城逃陣亦照滿例行法若失事重大文武大吏俱依律治罪如此則人知警畏自然力戰固守滿兵可以養威省力力省則財足財足則兵精果有強寇大敵一出立可掃除不至久征多費矣

一曰節省財用大凡多費則貧少費則富治國治家總是一理滿洲兵民素稱樸實非有驕奢但吉凶諸事或循例相沿或用情過厚不無多費致窘請 皇上稽古酌今

裁情就禮將滿洲兵民諸事制為典例務從儉約如吉慶宴會幣物毋過豐華敬禮神祇祭享毋傾家業送終致孝珍貴毋多焚化其餘可以類推仍須深加曉諭除其習見月有所節歲有所省目前可免窘迫積欠自能豐饒非惟

足兵實理兼亦治世遠猷也以上三策臣學識迂疎所見
淺近如有可採仰乞 皇上裁定施行

敬陳吏治四事疏 順治十二年 梁清標

吏部右侍郎兼內翰林秘書院學士臣梁清標謹 奏為
欽奉 諭旨敬抒所見仰祈 鑒裁事臣愚陋無似

蒙 皇上拔置佐銓夙夜圖維莫由報稱恭遇 上

諭求言仰見我 皇上求治盛心不遺封非敢不俯竭

愚忱仰佐萬一竊念臣衙門職在用入謹就職掌數陳有

四惟 皇上採擇焉

一崇守令之任民生休戚全關守令漢世特重其官如龔
遂黃霸卓茂諸人治績表著或假以便宜寬其文法或墮
書褒美賜爵通侯是以古今吏治漢為獨盛今體統凌替
文法拘牽有司力疲於趨承心怵於功令稍失上官之意

訶斥頻加兵馬往來橫遭侵辱即有賢者欲興一利除一害動多掣肘何怪職業不修治平寡效耶臣謂欲課實功必先一體統請 勅下督撫隆其禮文或豪強有凌侮把持者得以申請究治四體寬然庶可展布又察明初有到任須知一書內列規條三十一則綱目森然皆切民事例於銓除之日分受選官使知所遵守其後漸廢不行有司且茫然不識職守為何事矣今其書具在亦宜重加訂刻照例分發道按法守上下交修懋賞以鼓勵良重罰以儆墮窳其誰不自勉於吏治乎

一重清華之選 皇上宏開言路以襄盛治責言官既重則選授不可不詳在外推知中經舉卓異治行高等者自當優與清華乃俸深序及往往陞轉部曹一憑掣籤及值考選則平平無過者不得不一概行取非所以獎廉能

慎名器也察職掌內舊有部郎改授之例 本朝亦屢

行之況其人近在目前才品人所共知臣愚謂宜照舊例除臣部外五部郎中員外主事遇考選時許各部堂官遴選品行端方中懷謙直者咨送臣部與卓異推知一體考授科道等官斯臺垣濟濟才賢不致有沉抑之嘆矣

一嚴功過之衡勵世之權存乎黜陟賢者進之不肖者退之所責乎權衡也今止徭資俸按籍陞遷雖殊才異能與庸碌等激勸無憑治效曷覩臣請於選功二司設紀功紀過二簿令督撫察所屬各官任內完賦墾荒獲盜清獄凡地方應行事宜有能舉一政者即開實蹟報部詳註於冊除不肖官員具疏糾參外其有過可指者亦是報部註冊臣部於陞遷時考其政蹟多寡定人才短長上者優擢次者平陞下者左遷在內部寺等衙門亦各將所屬功過不

時咨送一同詳註推陞分別之法亦如之如是則循名責實人才競奮矣

一復徵聘之典國治必先得人匡弼尤需耆碩蓋光成國之典型而大賢者天下之望也漢唐宋元明歷代皆行徵聘燦然可考況皇上勵精圖治遠邁古昔豈無一二

名賢足當安車蒲輪之禮備霖雨舟楫之用者乎前奉

恩詔山林隱逸現行爲舉然大賢原不數見督撫止具

虛文臣請 勅下九卿公舉數人不論舊紳隱士務秉

虛公真知有大儒碩德學問經濟海內繫望者方許會同

舉奏 皇上禮聘至京詔以治道如所舉不謬即破常

格待之以重四方之觀瞻收旁求之實用亦 威世致治

所宜先也至於屏浮議核成功任賢人而勿疑信 詔

令而勿變是在 乾斷獨操何患積弊不除哉

請明是非以清治源疏 順治十二年 高辛胤

刑科都給事中臣高辛胤謹 奏為請明是非之實以清
治源事臣聞歐陽修有言曰天子曰是諫官曰非立殿陛
之前與天子爭是非者諫官也我 皇上親政以來屢
次求言言官未敢以是非爭辯是非未明亦諫者之氣短
也 皇上曰瞻顧曰疑畏臣竊瞻顧疑畏矣而猶

宥臣之罪仍求言懇切臣若不言臣罪不益滋甚乎謹就
國體所關者先列三款一用人是非一薦舉是非一賞罰
是非冒昧為 皇上陳之同一用人也去年 皇上

所甄別京官外轉者俱以道府等官用部臣所甄別京官
外轉者俱以對品用夫用人應論賢否一以外轉而榮一
以外轉而辱特為 皇上所甄別外轉者為賢乎留內
辦事者將置何等也將謂留內辦事者為賢乎外轉者反

有以員外超陞司道是方處而優陞之也將為留內外轉
者俱賢乎在內諸臣止候俸陞違反不如外轉邀恩且連
此用人之是非實臣下奉行未善亦臣瞻顧疑畏不敢言
之罪也同一薦舉廢紳士也在外直省督撫應

詔薦

舉者俱疑以觀望降級用且有致年月遲速不用者臣不
知盡皆觀望否也在內院諸臣薦舉者不言觀望不言降
級俱以原官用何內外輕重懸絕如此也更可異者以貪
賊革職之李人龍因會元二字拔置中書夫士辰會元係

皇上親政首科尚且以文字舛錯革去豈貪賊者可

借口會元耶臣恐後來凡中會元者以會元為護身之符
將無所不為矣即前之

皇上宥過之心降用亦為大

幸反超拔中書則又何也此薦舉之是非實臣下奉行未
善亦臣瞻顧疑畏不敢言之罪也十一年科臣林起龍參

河臣楊芳興一案以科臣之言俱非矣獨是科臣祈通格
等奏芳興報竣違限臣有不能解者通格等之言果非即
當治以涉虛之條若芳興不能盡是亦當議以薄罰請自
上裁何竟無是非矇眊了局芳興雖免議其如

皇上之法紀何其如公道何此賞罰之是非實臣下奉
行未善彼時臣在會議之列亦臣瞻顧疑畏不言之罪也
總之是非關乎國體源頭清白公道昭明富國強兵可徐
致也此臣區區愚忱伏乞 皇上詳察鑒往飭來為臣
下奉行未善者之戒其有裨於久安長治者非淺鮮矣

敬陳定蜀之策疏

順治十二年

李國英

四川巡撫臣李國英謹 奏為遵

旨陳言仰祈

睿鑒事

跪誦 明綸仰見我

皇上焦勞萬方下

問愚蒙雖古帝王躬覓工瞽之詢何以過此臣待罪西蜀

數年茫無寸效近蒙

採臣未議設鎮增兵士馬漸集

于疆場勝氣遂勝于壁壘正欲備陳管見稍贊

廟謨

況當北採納葑菲之際臣何敢不畢其一得之愚臣聞建
治平之略者在蘇民生之困而已蘇民生之困者在祛其
致困之言而已今天下伏莽未靖尚繁有徒而徵兵轉餉
騷動數省大為民生困弊者莫甚於滇黔之賊蓋自張逸
西充授首之後餘黨敗避風竄滇南緣天討之久遁

致螳臂之役逞猖獗於楚蔓延於粵狡啟於川雖屢經大
創而根株未剪皇上赫然震怒始命輔臣視師專辦

比寇滿漢大兵雲集湖南以至兩廣三巴處處慮其豕突
處處有重兵兵多費廣糧餉不貲因一隅之地累數省之
民因未安之地勞已安之民使我之虎臣勁旅日暴露於
卑濕炎暑之鄉我之南畝丁男日奔逐於行齎居送之苦

貲貲耗於徵輸營伍空於抽調積怨千和實由於此臣謂
此寇一日不除則數省之民必不能一日休息雖
上歎下竊祖之詔勤求察吏之方而防戍萬難減撤催科
萬難遲緩誠不能卜其息肩之期矣臣即以蜀省之事為
我 皇上陳之夫沃野千里原指成都而言其東南俱
財賦所出今歸我版圖者止山多田瘠出產寡薄之川北
一隅其東西南有食可以養兵之地皆為賊所盤踞近又
報於成都等處新聞屯墾似有持久之計我兵駐守保寧
一切糧餉皆仰給於 內帑轉運於三秦若再曠日費時
必至師老財匱此坐而自困之道也即蜀省而湖南兩廣
可以類推矣臣思我 朝定鼎以來兵甲之威天下無
敵今誅臣猛將依然如雲如雨而徧方小醜敢逆顏行非
兵之不強餉之不足也兵強餉足而封疆之臣畏難避苦

利鈍功罪之念先入於中以致貽憂

君父耳臣觀西

南之民苦賊虐焰不啻倒懸之迫且孫賊敗潰於湖南李賊敗潰於廣東其勢漸成瓦解臣聞非動不足以致靜非勞不可以求逸今湖南兩廣俱有重兵平西王固山額真侯墨勒根蝦之兵現屯漢中蓄銳甚久誠能早決廟

算定計合勒約會師期分道并進首尾夾擊賊力有幾豈能四面支持誠一勞永逸之計也萬一機會尚有所待請先勅平西王固山額真侯墨勒根蝦統率大兵今秋入川駐紮宜為各路之主宰調遣滿漢諸臣戮力前驅先取成都嘉寧食其今歲所耕之糧資其肥饒之地且屯且守使三軍宿飽得省輸運之勞次取重慶以扼咽喉然後乘流東下掃清夔閬以通荆襄之氣脈東西南既為我有已撤滇黔之門戶即為滇黔之張本蓋從古取滇黔者未

有不先由於取蜀也倘王師未可輕動請勅督臣與臣伺東西南諸逆但有機會可乘即同諸鎮臣漸圍恢拓得寸守寸得尺守尺勿徒除守一隅以致財力困竭如此兵力漸可休養民力漸可息肩無征役怨咨之氣上干天和雨暘若時災沴不生而天下猶不快覩昇平

至尊猶不少寬宵旰者臣未之信矣宋太祖曰卧榻之側豈容他人鼾睡韓愈謂淮蔡之功在斷與不斷耳古之賢君豈好為窮兵黷武哉蓋弔民伐罪誠有不得已者耳至於内外文武必同力一心而後事乃底績更新嚴飭諸臣凡有司兵餉之責者務須氣脈流通臂指相應勿執持一己之偏見而旁相掣肘勿謂利害不相關切而呼應不靈此尤成功之根本而滅賊之要務也

慎批駁清積案疏順治十二年

武攀龍

刑科給事中臣武攀龍謹 奏為請嚴批駁之規以清積
案之弊事古者慎德緩刑意惟主於明允而重期之以刑
不留獄蓋以上多塵積因而下有寃民原本不清即役役
焉徒敝精神無益也向者大獄沉滯臣有京詳宜復一疏
業蒙 俞允似足疏其流矣猶恐未清其源就中事件

尚有遲至四五年不結者因覈株連皆批駁不悞之所致
也從來盜賊人命重大事情院道不得不批府廳府廳不
得不批州縣者勢也府廳三四駁而後詳之司道司道三
四駁而後詳之撫按者例也此例牢不可破即層累而上
曠日稽時亦非言餘可了況乎批駁為害更有不可言者
或事多猶豫則脫却以俟後人情有異同則撲按以需定
論或暮夜之金可入憑賄賂為展辦之資情面之緣可做
借駁審示公道之大或意主先入之言而不顧情理之當

或欲翻窮兇之案而不參與論之同甚至刻擊為成假酷
吏以洩其忿羅織為明授意旨以濟其貪幾令無辜赤子
飲恨吞聲莫可控訴如扶風縣牛相坤勢惡相濟害人一
疏內云撫院摘駁刑廳刑廳轉批經歷抑思盜賊何事經
歷何官而顧任情顛倒致令極寃無控匄匄都門也批
駁之害可勝道哉懇乞 皇上勅下撫按將原問刑廳

確查姓名嚴詰重究以戒溺職仍通行申飭以後凡各省
重大獄情在外問刑衙門初詳批縣親審次擇屬縣之廉
明者二三會審次府廳公審每審招詞一一通詳道府司
院今其各出意見細心查駁毋繫仰候詳行舊例獄成全
招達部如有瞻徇聽科道摘參如是即有有力之家能得
之有司斷不能盡得之司道且府州縣惟恐聽斷不明闕
其殿最自有其難其慎之思而各道司原情比律極力推

敵亦無憑臆雄行之理三招成而上之撫按憑以入告直期月事耳他如經歷等官嚴為禁止無使得與刑名恣其荼毒則積案可少結民命可少甦其於蘇理沉獄端本清源之道庶幾得之矣

免運糧草以便兵民疏順治十二年 楊運昌

國史院侍講學士臣楊運昌謹 奏為敬陳一得之愚以備 採擇事我 皇上軫念兵民疾苦 諭內外

文武官員各陳所見臣忝竊侍從謹就耳目所及者為 皇上陳之臣聞漢文帝之世不輕用民之財不輕用民之力致海內殷富我 皇上親政以來罷不急之徵勤蠲賑之令方且婉美堯舜而遠駕漢文然而德澤未宣教化未敷者良由有司奉行之未當百姓苦於無名之役費更甚於有名之催科兼之水旱頻仍饑饉相迫非流離四

方則展轉溝壑矣何小民遭逢 盛世獨不能邀 皇

恩於萬一哉如大兵養馬地方我 皇上勅諭用過糧

米草豆動支正項及器具運價酌量開銷其念兵及民亦可謂詳且盡矣然事出 特恩所以補目前之不足法

立經久所以養後來之有餘今南中未靖方需此師養馬地方應協濟者動支正項誠不費民間一草一粒矣但相去有二三百里者有四五百里者一切運送不資於民力不能也乃民之處此亦極苦矣臣里居適置大兵養馬彰德衛輝懷慶協濟親見每夫一名運糧三斗值銀不過三錢運價則銀一兩二錢矣每夫一名運草八束值銀不過二錢四分運價亦一兩二錢矣是運價四五倍於正價也在有司既不能為無米之炊在百姓急於 王事又不敢耽緩須臾以誤軍需況天雨連綿泥淖深滑老弱號泣

道旁青衿負載荒郊愁窮萬狀鄭國難繪甚至吏胥因緣
為奸出納之際上下其手種種苦累尚忍言哉果即酌量
銷算猶且得不償失況經年累月徒付之不可知之數也
臣所謂無名之役費更甚於有名之催科者此也臣愚以
為與其民運何如官買寬一番力役省一番物力 朝

廷不必有蠲恤之名百姓已受無窮之賜有益於兵無損
於民法稱兩便也宜 勅戶部詳確覈議永著為令凡

係大兵養馬地方附近協濟州縣恪遵 勅諭實力奉

行其二百里以外應協濟地方著令該管州縣動支正項
親赴養馬之處預行買辦糧米草豆及一切器具即自放
支或州縣當衝繁之地不敢遠離者擇委清慎府佐官用

朝廷之金錢辦 朝廷之公事盡一己之職業休

為民之性命事完之日清楚銷算其該管州縣官務要仰

承我 皇上宵旰隱憂視國如家愛民如子事先不許私派民間事後不得冒破官物如有奸貪官胥指稱供應名色橫加科歛或乘機侵折希潤私囊該督撫即時題參庶人心知警百姓之膏血不致剝削既不輕用民之財又不輕用民之力其於兵民未必無小補也

皇清奏議卷九